

Ծ Ր Ա Գ Ի Ր

ՄԱՆԿԱՊԱՏԱՆԵԿԱՆ ՄԱՐԶԱԴՊՐՈՑՆԵՐՈՒՄ ԱՇԽԱՏՈՂ
ՄԱՐԶԻՉ-ՄԱՆԿԱՎԱՐԺՆԵՐԻ ՎԵՐԱՊԱՏՐԱՍՏՄԱՆ ՀԱՐՑԵՐԻ
ԿԱԶՄԱԿԵՐՊՄԱՆ

ԻՐԱՎԻՃԱԿԻ ՆԿԱՐԱԳՐՈՒԹՅՈՒՆԸ

Հայաստանի Հանրապետությունում գործում է **166** մանկապատանեկան մարզադպրոց: Այդ մարզադպրոցներում **45** մարզաձևերով աշխատում են **1834** մարզիչ-մանկավարժ, այդ թվում՝ համայնքային ենթակայության մարզադպրոցներում՝ **983**, մարզպետարանների, Հայաստանի Հանրապետության սպորտի և երիտասարդության հարցերի նախարարության և Հայաստանի Հանրապետության կրթության և գիտության նախարարության ենթակայության մարզադպրոցներում՝ **533**, մարզական հասարակական կազմակերպություններում՝ **318** մարզիչ-մանկավարժ:

Միայն Երևանում աշխատում է **729** մարզիչ-մանկավարժ: Մարզիչներից **1175**-ը ունի բարձրագույն մասնագիտական կրթություն: «Մանկապատանեկան սպորտի մասին» Հայաստանի Հանրապետության օրենքով (**21**-րդ հոդվածի **13**-րդ կետ) մանկապատանեկան սպորտի բնագավառի մարզիչ-մանկավարժների պատրաստումը և վերապատրաստումը կազմակերպում է Հայաստանի Հանրապետության սպորտի և երիտասարդության հարցերի նախարարությունը: Մանկապատանեկան մարզադպրոցներում աշխատող կադրերի վերապատրաստման խնդիրը խիստ արդիական է, քանի որ **1834** մարզիչից **659**-ը չունի բարձրագույն մասնագիտական կրթություն և **1990**-ական թվականներից, կապված սոցիալ-տնտեսական իրավիճակի կտրուկ փոփոխման, ինչպես նաև պատե-

րագմական իրավիճակի հետ, Հայաստանի Հանրապետությունում չեն իրականացվել վերապատրաստման շարունակական ծրագրեր, որի հետևանքով աշխատող մարզչական կադրերը հետ են մնացել արագ, թռիչքաձև զարգացում ապրող սպորտային նվաճումներից: Այդ է վկայում նաև **1990**-ական թվականներից սկսած երկար ժամանակ միջազգային մրցաշարերում Հայաստանի Հանրապետության մարզիկների բարձր արդյունքներ չունենալը:

Հայաստանի ազգային օլիմպիական կոմիտեի և առանձին ֆեդերացիաների կողմից իրականացվող վերապատրաստման դասընթացների ծավալները խիստ սահմանափակ են՝ հիմնականում ընդգրկելով Երևան քաղաքի և մոտակա մարզերի մանկապատանեկան մարզադպրոցների ոչ մեծ թվով մարզիչ-մանկավարժների:

Հայաստանի ազգային օլիմպիական կոմիտեն **2006, 2007** և **2008** թվականներին կազմակերպել է **10-15** օր տևողությամբ, **8** մարզաձևից՝ յուրաքանչյուրից **25** մարզչի մասնակցությամբ Մարզչական տեխնիկական կուրսեր:

Խնդրի լուծմանն օժանդակելու նպատակով Հայաստանի Հանրապետության սպորտի և երիտասարդության հարցերի նախարարությունը համագործակցության պայմանագրեր է կնքել Բելառուսի Հանրապետության, Լայպցիգ և Մոսկվա քաղաքների հետ, որտեղ ներառվել են նաև վերապատրաստմանը վերաբերող կետեր:

Նշված խնդիրը լուծելու համար Հայաստանի Հանրապետության սպորտի և երիտասարդության հարցերի նախարարությունը նախատեսում է իրականացնել մանկապատանեկան մարզադպրոցներում աշխատող մարզիչ-մանկավարժների վերապատրաստման կազմակերպման ծրագիր (այսուհետ՝ ծրագիր):

ԾՐԱԳՐԻ ՆՊԱՏԱԿԸ

Ծրագրի նպատակը մանկապատանեկան մարզադպրոցների մարզիչ-մանկավարժ-ներին ուսուցման ժամանակակից պահանջների և մեթոդների, սաների ֆիզիկական դաստիարակության արդի հիմնախնդիրների, մարզչական և կազմակերպչական նորագույն նվաճումների և արդյունքների մասին իրազեկումն ու ուսուցանումն է:

ԾՐԱԳՐԻ ԽՆԴԻՐԸ

Ծրագրի խնդիրը Հայաստանի Հանրապետությունում աշխատող **1834** մարզիչ-մանկավարժից յուրաքանչյուր տարի **180-210** անձի համար ցիկլային դասընթացների միջոցով վերապատրաստման անցկացումն է:

ԾՐԱԳՐԻ ԻՐԱԿԱՆԱՑՈՒՄԸ

Վերապատրաստումն իրականացվելու է **14** օր տևողությամբ, **30** անձից բաղկացած խմբով, **72** ժամ ընդհանուր ծավալով, շուրջ **24** թեմաներից ու առարկաներից, ինչպես տեսական, այնպես էլ գործնական պարապմունքների միջոցով՝ համաձայն Հայաստանի Հանրապետության սպորտի և երիտասարդության հարցերի նախարարի կողմից հաստատված ուսումնական պլանի: Դասընթացները վարելու են հրավիրված բարձրակարգ մասնագետները: Տարվա ընթացքում նախատեսվում է վերապատրաստել **180** մարզիչ-մանկավարժի: Վերապատրաստման խմբերի ձևավորումն իրականացնում է Հայաստանի Հանրապետության սպորտի և երիտասարդության հարցերի նախարարությունը: Մարզչական կադրերի վերապատրաստման տարեկան ժամանա-

կացույցը, մանկապատանեկան մարզադպրոցներում աշխատող մարզիչ-մանկավարժների վերապատրաստման կազմակերպման ուսումնական պլանը հաստատում է Հայաստանի Հանրապետության սպորտի և երիտասարդության հարցերի նախարարը: Տարեկան իրականացվելու է վերապատրաստման 6 ցիկլ, որից 4-ը՝ մարզերի, իսկ 2-ը Երևան քաղաքի մարզիչների համար: Դասընթացներն անցկացվելու են Հայաստանի Հանրապետության սպորտի և երիտասարդության հարցերի նախարարության ենթակայության «Երևանի օլիմպիական հերթափոխի պետական մարզական քոլեջ» պետական ոչ առևտրային կազմակերպությունում՝ նպատակ ունենալով մարզերից վերապատրաստման գործուղված մարզիչներին ապահովելու հանրակացարանով և տեղում օրական երեքանգամյա սննդով՝ պահպանելով նրանց միջին աշխատավարձը: Մարզիչ-մանկավարժի գործուղման ծախսերը հոգում է նրա հիմնարկը: Պետական ոչ առևտրային կազմակերպությունում անցկացման վայրի ընտրությունը պայմանավորված է այն հանգամանքով, որ այնտեղ առկա են բավարար նպաստավոր պայմաններ՝ ինչպես գործնական և տեսական պարապմունքներ անցկացնելու, այնպես էլ՝ կեցության համար: Վերապատրաստման դասընթացի կազմակերպումը չի խաթարի քոլեջի ուսումնամարզական նորմալ գործընթացը, այլ լրացուցիչ հնարավորություն կընձեռի նրա աշխատակազմի 3 անդամին՝ ստանձնելու կազմակերպչական լրացուցիչ պարտավորություններ՝ ստանալով համապատասխան աշխատավարձ: Վերապատրաստման ցիկլի վերջում մարզիչ-մանկավարժներն ստուգաբար կհանձնեն 5 անձից բաղկացած քննական հանձնաժողովին, որի կազմը հաստատում է Հայաստանի Հանրապետության սպորտի և երիտասարդության հարցերի նախարարը:

Վերապատրաստման դասընթացներն ավարտած մարզիչ-մանկավարժներին տրվելու են Հայաստանի Հանրապետության սպորտի և երիտասարդության հարցերի նախարարի կողմից հաստատված ձևին համապատասխան ավարտական վկայականներ:

ԾՐԱԳՐԻ ՖԻՆԱՆՍԱՎՈՐՈՒՄԸ

Ծրագրի ֆինանսավորումն իրականացվում է Հայաստանի Հանրապետության պետական բյուջեի միջոցների հաշվին՝ Հայաստանի Հանրապետության սպորտի և երիտասարդության հարցերի նախարարության կողմից ներկայացվող նախահաշվի սահմաններում:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԿԱՌԱՎԱՐՈՒԹՅԱՆ ԱՇԽԱՏԱԿԱԶՄԻ
ՂԵԿԱՎԱՐ

Դ. ՍԱՐԳՍՅԱՆ